

Xujun xi tjun kits'inkjihí nda postru Pablo xuta ninku Tesalonika

**B'i ts'ín kikjaniñaha Pablo xuta
ninku xi tjin nanki Tesalonika**

1 An Pablo, Silbano ko Timoteo tísuniñaihi, jun xuta ninku nanki Tesalonika, xi kikj'áts'enuu Ntia Na'miná ko Nda Ntiana Jesucristo.

Kas'enuu kjuanda ko kjuajyu.

**B'i ts'ín tít's'inkj'áitsjen Pablo xi nkú
ts'ín kits'inkj'áihín xuta ninku nanki
Tesalonika én nda tsuhu Jesucristo**

²Tehente nk'ie nga chubakoi Ntiana chubantjaihi ko 'bqihí máb'achjihí Ntiana at'aha kichubó éhen. ³Nginkun Ntia Na'miná f'áitsjen teheneni xi nkú ts'ín s'ejinnuu Ntiana ko t'n'o xá xi mjehe, xi nkú ts'ín tjonuu ko t'bisinkoo xinkiu, ko xi nkú ts'ín t'n'echjúkjoo kjuanimá xi t'bitjajún nga t'chuyóho nga k'juaf ngáha Nda Ntiana Jesucristo.

⁴Jun já nts'e, tjoho Ntiana jun ko yai nga j'ájinuu. ⁵At'aha nk'ie nga kik'ienimí én nda tsuhu Jesucristo ajinnuu, najmi tu suba én kichubai. Kis'ejña chji ní nga'yúhun Ntiana. Espirituhu Ntiana kits'inxá ko ndahachí najmi jo jan kamaní nga kichubai. Yo xi nkú n'e tintsuabai ajinnuu nga ngandanuu ni xi kin'ej.

⁶Nk'ie nga kichasení ta kichasoohó Nda Ntiana, b'a ts'ín tsinchiyó xi nkú ts'ín kuintsuboo. At'aha nk'ie nga ja kin'ekjóhoon éhen Ntiana, ta kisakúnuu nkjin t'kjá kjuanimá, tunga Espirituhu ní Ntiana kitsjánuu kjuatsjo. ⁷B'a ts'ín y'ejña chjihí ruu ngatentee xuta xi s'ejhin Ntiana xi tjin nga ngúsuhan ante Macedonia ko ante Akaya xi nkú ts'ín tsjenkiáá Nda Ntiana.

⁸At'aha jun tjun kichubó éhen Ntiana ko t'findju éen najmi tu suba ante Macedonia ko ante Akaya. Tu má níhi tíya xi nkú ts'ín t's'ejinnuu Ntiana. Kui nga najmi ta machjéhen ra tsa nkú kuixín sahaní jin. ⁹At'aha xuta t'incha nchjanijmíyaha xi nkú ts'ín jun kin'ekj'ánni nk'ie nga tsichusejhi, ko xi nkú ts'ín kin'ekj'í t'axiún ntia

xi ntsja xuta ts'innndaha nga kin'ekj'hoon Ntiana. Nd'ai yjankiu Ntia xi t'ijna tik'uun. Kjuaxi nga kui xi Ntiana. ¹⁰Nd'ai tichuyohoo Nt'hi Ntiana xi niba ngaha ndjiojmi jan. Kui xi Jesu xi Ntiana kits'inkj'aya ngaha ra ngabayoo ko xi ts'ink'anina nistjin nga nibanehe kjuakjahan Ntiana asuntee.

**B'i ts'in tits'inkj'aitjen Pablo xi nku ts'in
kits'inxá ajihin xuta ninku nanki Tesalonika**

2 At'aha ja yo jun, ja nts'e, nk'ie nga najmi xa tiya kama nk'ie nga tsichii ajinnuu. ²Yo nga un kikieni ko ch'on kamat'ain nanki Filipo kintehe ni nga tsichii ajinnuu. Tunga Ntiana há kitsja nga'yunni, kui nga ndja kin'esjeheni yjoni nga y'enijmí én nda tsuhu Ntiana ajinnuu. B'a kin'ej ndaha tsa nkjin maha xi ngji kontrani.

³Najmi ni xi ngasten ko tsa ni xi ch'onk'un nibaha ra ni xi b'enijmí ko ta ndaha najmi ch'anachaihi xuta. ⁴Nda ní tsaseni Ntiana ko kin'ekjas'enni nga k'úenijmí én nda tsuhu, ko b'a n'e tichubai. Najmi xuta tí'baihi kjuatsjo. Ntia nina tí'baihi kjuatsjo, kui xi be xi nku ts'in tjintuyáni.

⁵Xi nku n'e ja yo, najmi kichuba un uin ko ta ndaha najmi kich'anachaihi, tsa tu xi b'a ts'in kjuaihini toon. Ntiana be nga b'a tjin ni xi tixian. ⁶Najmi tsinchisjai tsa kjuachánka sakúni ajinnuu ko ta ndaha ajihin xuta xingisoo, ⁷ndaha tsa jin xi ja postruhu Cristo kama kai tsinchihi ni xi machjenni. Kichase sisihin. B'a kin'ej xi nku ts'in nku tachjuun xi basehe nt'hi.

⁸Yun nkjun tjoni jun, kui nga santaha najmi tu nku én nda tsuhu Ntiana kin'ekjas'ehen ri. Tsa ni xi kuayántjaihi ri kai, tsayantjaihi ri. 'Yun nkjun kisasini jun. ⁹¿A fáitsjennuu, ja nts'e, xi nku ts'in kin'exái ko kiyai kjuanima ajinnuu? Nistjin nistjen kin'exái tu xi najmi ch'a kamahani nk'ie nga y'enijmíhi én nda tsuhu Ntiana.

¹⁰Jun ko Ntiana be xi nku ts'in je ko naxu tintsu bai ajinnuu jun xi s'ejinnuu Ntiana, ko nga najmi tjin xi kjanineni tsa mí nihi. ¹¹Yo xi nku ts'in kichihin nga nkúnku jun, xi nku ts'in kuhun xi tí'mi na'mi nt'hi. ¹²Kik'ai niyáhi ko kik'ai nga'yihin. Kik'inyaihi nga kuintsuboo xi nku ts'in tihin nga k'úentu xuta xi ts'e Ntiana. At'aha jun j'ajinnuu Ntiana nga kuitjas'enjiun nga Ntiana kuatexumanuu ko nga sakúnuu kjuachánkaha.

¹³Kui kjuaha nga najmi n'ekj'ayai nga tehente 'baihi máb'achj'hi Ntiana, at'aha kichjubó éhen Ntiana xi kik'ienijmí. Najmi kin'ekj'hoon xi nkúhu tsa éhen xuta. Kjuaxi kjáihin nga kui xi éhen Ntiana ko tits'inxájinuu nd'ai jun xi s'ejinnuu Ntiana. ¹⁴Jun ja nts'e, b'a ta kamat'on xi nku kamat'ain xuta ninkuhu Ntiana xi tjin ante Judea xi ta s'ejihin Cristo Jesu. Un kikienuu aya ntsja xuta nankinuu xi nku ts'in ta un kiekehe xuta ninku xu'bo aya ntsja xuta judio xinkjin.

¹⁵Kui xi ta incha kits'ínk'ien Nda Ntíaná Jesu ko já profeta, ko jin incha kikatjennkini. Najmi maha incha ts'ín ni xi sasíhin Ntíaná ko fi kontraha ngatentee xuta. ¹⁶B'éch'oní nga b'enijmíhi xuta xi najmi ntje judio tjeheñ ra én xi ts'ínk'ankihi xuta. Tehente títs'íntsené jé yjoho nga b'a tǐncha ts'ín, tunga nd'ái ja j'aik'úhūn xuta xu'bo kjuakjahan Ntíaná.

B'í ts'ín kitsúya Pabló nk'ie nga ta mjehé ngáha ra ngjuaisehe xuta ninku Tesalonika

¹⁷Jun já nts'e, kama mje nkjúnni ko tu ni xí tsinchisjái niyá ní nga kuankínse ngáha ri nk'ie nga ja j'a chuba nǐstjin nga tsankin t'axín má nga tintsuboo, ndaha tsa najmi ngji t'axíhin xinkjín animaná. ¹⁸Kui nga kama mjeheni nga kuankínse ngáha ri. An Pabló nku jo niyá kama mjena nga kfínse ngáhanuu kai, tunga ndanindooho y'échjani. ¹⁹At'aha, ¿mí nihi xi tǐchuyáhi ko mí nihi xi kama kjuatsjoni ko mí nihi xi kama chánka n'esjekohoni yjoni nginkun Nda Ntíaná Jesucristo nk'ie nga kj'uaí ngáha? ¿A najmi juhún? ²⁰Kjuaxi nga jun xi kjuachánkani ko kjuatsjoni.

B'í ts'ín kitsúya Pabló mí kjuaha nga y'éxáha Timoteo

3 Kui b'a maha nk'ie nga najmi ta kama 'yún sahani, tu xi b'a ts'ín chahani ni xi tímat'on y'endaí nga kuíntsuba subai nanki Atena ²ko kin'ekjǐ nda nts'eé Timoteo, nga kui xi ngjuaisenuu. Kui xi ta títs'ínxát'aha Ntíaná nga tǐb'énjímí én nda tsuhu Cristo. Kin'ekjǐ tu xi tsjá nga'yúhūnnuu nga kuasinkohonuu ko ndjá kuinchajiun xi s'ejinná. ³Najmi mjeni tsa tjín xi tjín ajinnuu kfehe k'un tu ngat'aha ni xi tǐf'ajin. Ja yo nga tjíhin nga b'a kamat'aán.

⁴At'aha nk'ie nga tintsuba sai ajinnuu, tsixínya tǐtjuíhin nga sakúná kjua'un, xi nkú nga ja kama ko yo. ⁵Kui kjuaha tu xí kis'entahána. Kui nga kits'ínkjísehenuu Timoteo tu xi skuehena tsa tu b'a ts'ín ndjáhá s'ejin sanuu. Najmi mjena tsa ndanindoo kjút'ayák'unnuu, tsa b'a ts'ínndyjaha xá xi kin'eí ajinnuu.

⁶Ja kik'óya ngáha Timoteo nga ngjisenuu. Éñ nda tsu j'aikoni. B'a títsu nga tu nkú b'ahá ts'ín s'ejinnuu Ntíaná ko nga tu b'a ts'ín tjíhinnuu kjuatjo. Kitsúyani nga tsjo ma tehentenuu nga f'áítsjennuu jin ko nga tu xí mjehénuu cha ngáhani xi nkú ta ts'ín jin 'yún mjeni nga chahí jun.

⁷Kui kjuaha, já nts'e, ajíhin kjuanusin xi tjínni ko kjua'un xi tǐbeni, tísakú nga'yúnni nga tǐnu'yái nga tu nku b'ahá ts'ín ndjá s'ejinnuu Ntíaná. ⁸Tǐtsjá nga'yúnni nga yayi nga ndjá tinchajiun Nda Ntíaná. ⁹Najmi tísakújinni én xi nkú ts'ín k'uaíhi ri máb'achjǐhi Ntíaná at'aha ndjá tinchajihūn Nda Ntíaná ko tǐbaini kjuatsjo nginkun Ntíaná.

¹⁰Nistjin nistjen 'yún nkjún binchiihi Ntíaná tu xi katsjánteheni nga chase'a ngáhaná xinkíá kō nga n'endjuút'ai ni xi s'ejinnuu, tsa tu aha tjín ni xi ndyjat'a sa.

¹¹Katsjáníyáni Ntía Na'miná kō Nda Ntíaná Jesu tu xi kama kuankíhínse ngáha ri. ¹²Kō 'yún katsjá sanuu kjuatjo Nda Ntíaná tu xi b'i ngján n'etjōhonu xinkiu kō xuta xingisoo xi nkú ts'ín tjoní jun. ¹³Katsjá nga'yúhun animanuu tu xi najmi chumi ni sakújihinnuu kō je s'eyahanuu nginkun Ntía Na'miná nistjin nga kj'uaíko Nda Ntíaná Jesu ngayjee xuta xi kikj'áts'e.

B'i ts'ín tsakúya Pablo xi nkú ts'ín tjíhin nga kuintsuáá nginkun Ntíaná

4 Nd'ai já nts'e, ngajoho Nda Ntíaná Jesu tíbinchiihi kō tí'baj niyáihí nga n'ehenu xi nkú ts'ín kisakúyanuu kō xi nkú tín'o tu nkú b'ahá n'e so. At'aha ja y'ejña chjiihi xi nkú ts'ín tjíhin nga kuintsuáá kō nga k'uohoo kjuatsjo Ntíaná. ²Yo kjuatéxuma xi kin'ekjas'eihín, kui kjuatéxumaha xi y'ejña Nda Ntíaná Jesu.

³Ni xi mjehe Ntíaná, mjehe nga xuta je kamo nginkun. N'e t'axíhuun yjonuu nga chubá súntukonú xinkiu. ⁴Nga nkúnkú xi tjín qjinnuu katumankjihín xi nkú ts'ín je kō kixi ts'ínchjén yjonintehe. ⁵Najmi tu nku ni xi fásihín yjonintenuu n'esihuun, xi nkú nga ts'ín xuta xi tjín asuntee xi najmi be Ntíaná.

⁶Ndaha nku najmi tu ch'a xi kuankikjuaha nda nts'e kō tsa k'uanachaha. Xi nkú ts'ín kik'inyaihi kō y'ejña chjiihi, Ntíaná ts'ínnijéhe ra xuta xi ts'ín kui nii. ⁷At'aha najmi j'ájinná Ntíaná tsa tu xi ni xi chuntí kuintsuáájihinná. J'ájin níná tu xi ni xi je kuintsuáájihinná nginkun. ⁸Kui b'a maha, xi ts'ín t'axíhin kjuatéxuma xu'bi, kui xi najmi kuatéxumaha xuta títs'ín t'axín. Kjuatéxumaha ní Ntíaná xi kitsjánuu Espiritu Santo títs'ín t'axín.

⁹Ngat'a ts'e kjuatjo xi tjíñajinná ñá xi nts'eé mahaná, najmi machjén tsa k'uet'á xujunuu. At'aha Ntíaná ja tsakúyanuu nga b'i ngján tjíhin nga n'etjō xinkiu. ¹⁰B'a ts'ín kjáihín t'n'etjō ngayjee já nts'eé xi tjín nga ngúsuhun ante Macedonía. Tunga jin tíbinchiihi, já nts'e, nga 'yún nkjún kas'e sanuu kjuatjo. ¹¹Tínchísjo nga kas'enuu kuajyu nga tintsuáá, kō n'oo ni xi ts'ájun, kō nts'oo n'exáqohonu. B'a n'ō xi nkú tsixíin nga n'oo, ¹²tu xi nda ts'ín kuinimahanu qjihín xuta xi najmi s'ejihín Ntíaná kō tu xi najmi chumi nihi xi ndyjat'ahanuu.

B'i ts'ín tsakúya Pablo xi nkú ts'ín kj'uaíkj'áná Nda Ntíaná Jesu

¹³Jun já nts'e, mjeni nga choo ni xi kamaha xuta xi ja k'ien, tu xi najmi k'úé babaha ra yjonuu xi nkú ts'ín 'be babaha xuta xingisoo, xuta xi najmi chumi nihi xi tókuyáha. ¹⁴Xi nkú ts'ín s'ejinná nga k'ien

Jesu ko j'áiya ngáha ra ngabayoo, b'a ta ts'ín s'ejinná nga Ntíaná ts'íinkj'áiyako ngáha ra Jesu xuta k'ien, kui xuta xi kis'ejihin Jesu.

¹⁵Ehen Nda Ntíaná ni xi túbixínyaí nga ñá xi tintsubaá nistjin nga kj'uaí ngáha Nda Ntíaná najmi kuitjá títjuhuún xuta xi ja k'ien.

¹⁶At'aha nk'a ján nibaha Nda Ntíaná. Kuínú'yá nku nta xi k'uéxá ngajoho Ntíaná, kui xi ntaha ntítsje k'aku, ko kjuane tjioho Ntíaná. Tjun xuta xi kis'ejihin Cristo kintehe ni nga kuayá kj'uaíyaha ngabayo. ¹⁷Ko askahan ñá xi tintsuba tík'un saá kui nistjiun n'ekjínjikoná xuta xu'bo ajin nintiu xi má nga n'ekjáhíin Nda Ntíaná nk'a ján. Yohó ni ma kuíntsubaka síhaán Nda Ntíaná. ¹⁸Kui én xu'bi tjen nga'yúnkoho ruu xinkiu.

B'í ts'ín kitsúya Pablo xi nkú chun nk'ie nga kj'uaí Nda Ntíaná

5 Jun já nts'e, ngat'a ts'e nistjin xi nibá ko nkjé kuitjusun niy, najmi machjehen tsa k'uet'á xujunnuu. ²At'aha jun ja ya sisiun nistjin nga kj'uaí ngáha Nda Ntíaná, kj'uaí nistjin nga najmi ch'a xi tókuyáha, xi nkú ts'ín f'ai nku nda ndyjé nga jyuun. ³Nk'ie nga: “Tjinná kjuajyu nd'ai ko ja nda n'e tintsubaá”, kuitsu xuta, nk'ie tjen'yún nibanehé ra ni xi ts'íinkjehe xi nkú ts'ín nibanehe chjinti nku tachjuún xi ja tsíhin ntí. Najmi s'e má kuanka 'ma xuta kui nistjin xu'bo.

⁴Tunga máha jun, já nts'e, najmi má jyuun tintsuboo, tsa tu ndyjahánuu nga kj'uaí nistjin xu'bo xi nkú joyaha nku nda ndyjé. ⁵Ngatentoo tintsuboo má ndzjeen ko má nistjiun. Najmi má nistjen ko tsa má jyuun ts'ená. ⁶Kui nga najmi tu sufehená xi nkúhu xuta xingisoo. Tintsuba tík'un níná ko chaseéhe ni xi n'eé.

⁷At'aha xi fantufé, nga jyuun fantufé, ko xi ma ch'i, nga jyuun ma ch'i. ⁸Tunga ñá xi má ndzjeen ts'ená tjihin nga n'enkjín sisihín tak'aán ko k'úendaá yjoná xi nkú joyaha já jun xi kjaán. N'e s'ejián Ntíaná, kas'ená kjuatjo, ko chúyahaá nga k'uankiá. B'a ts'ín chjúhun raá yjoná xi nkú ts'ín kuhun yjoho já jun xi kjan.

⁹At'aha najmi b'a ts'ín y'enda Ntíaná tsa ñá sakúná kjuakjahan. Y'éjña ní nga Nda Ntíaná Jesucristo ts'íink'ankiná. ¹⁰Kui xi k'ientjáhíiná tu xi kuíntsuba tík'un kohoná, ndaha tsa ja tsayaá ko ndaha tsa tintsuba tík'un saá ei asunntej. ¹¹Kui b'a maha, b'í ngján tjen nga'yúhunruú xinkiu ko tísinkoo tu xi ndjá kuínchunjíhinu xi s'ejinná. B'a n'oo xi nkú nga t'n'o santaha nistjin nd'ai.

B'í ts'ín tsakúya Pablo ni xi incha ts'íin xuta ninku

¹²Jun já nts'e, túbichihí nga katumankjinnuu nga Nda Ntíaná tít'sínxát'aha já xi tíncha ts'ínxájinnuu, já xi yja títjunnuu ko tít'sjáníyánuu. ¹³Yún chankjún ko n'etjó jóo tu ngat'aha xá xi tíncha ts'ín. Ko b'í ngján kas'enuu kjuajyu nga tintsubaáko xinkiu.

¹⁴Jun já nts'e, ta tǐbinchiihi ni xu'bi. Tjen niyóhoo xi najmi mjehe ts'ínxá. Tjen nga'yúhuun xi tifehe k'un. Tisinkoo xi najmi ndjá tǐnchajin xi s'ejinná. N'e'yún tak'uhuun ngatentee xuta. ¹⁵Tsa tǐn ajinnuu xi ch'on kin'ehe, chasoo nga najmi tu ts'ín ngajoya ngáha ni xi kin'ehe. B'ǐ ngján nda n'e tehentohoo xinkiu ko ngayjee xuta xingisoo.

¹⁶Tehente tsjo kat'enuu. ¹⁷Tu nkú chubakonú Ntíaná. ¹⁸Tu mí nihí ni xi kamat'on, tjohoon máb'achjǐhi Ntíaná. At'aha kui niu xi mjehe Ntíaná nga n'oo jun xi s'ejinnuu Cristo Jesu.

¹⁹Najmi tu n'ek'ienyo nd'í xi tǐts'ínkat'ai Espirituhu Ntíaná ajinnuu. ²⁰Najmi tu tohón manuu xi nchja én xi tsjá Ntíaná. ²¹Chasohoo ngayjee tu mí nihí ni nga tǐnchísjaijiun ni xi nda ko kui xi n'oo. ²²T'ech'óhoo yjonuu ngayje tǐkjá ni xi najmi nda.

²³Ntíaná xi tsjáná kjuajyu, kui xi kats'ín jeyjenuu nginkun ko kakunnuu, tu xi ndahachí najmi s'ehe jé ajin kjuankjintak'unnuu ko tsa ajin animanuu ko tsa ajin yjonintenuu nistjin nga kj'uaí ngáha Nda Ntíaná Jesucristo. ²⁴Ntíaná xi kixǐ ts'íntjusun ni xi nchja, kui xi j'ájinnuu ko ts'íntjusun ni.

B'ǐ ts'ín kits'ínkje Pablo xujuin

²⁵Jun já nts'e, nk'ie nga chubakoo Ntíaná, chubantjáini.

²⁶Ngajoni súniñaha ruu ngatentee já nts'eé.

²⁷Ngajoho Nda Ntíaná tǐbankihinuun nga kan'eya xujuin nginkun ngatentee já nts'eé.

²⁸Kas'enuu kjuandaha Nda Ntíaná Jesucristo.